

Mudansa tetu orsamentu sei afeta ba PIB no Fundu Petrolíferu



Diskusaun no votasaun Proposta Lei OJE 2022 iha faze especialidade, iha sala plenária Parlamentu Nasionál, kuarta (15/12) Imajen TATOLI/António Gonçalves

DILI, 16 dezembru 2021 (TATOLI)--Parlamentu Nasionál (PN) liuhosi sesaun plenária, kinta ne'e, aprova ona Proposta Lei número 35/V (4^a) Orsamentu Jerál Estadu (OJE) tinan fiskál 2022, iha finál globál, ho montante \$1.949.043.291.

Montante aprovalu biliaun \$1,95 kompostu husi Orsamentu Administrasaun Sentrá, \$1.859.477.947, Orsamentu Rejiaun Administrativa Espesial Oé-cusse Ambeno (RAEOA) \$89.565.344 no Seguransa Sosiál ho montante \$299.285.500.

Tetu orsamentu finál aprovalu iha aumentu 16,4% hosi montante inisial billiaun \$1,675 ne'ebé mak Governu apresenta ba PN iha loron 15 outubru 2021.

“Mudansa iha tetu orsamentu ne'e sei afeta ba PIB no Fundu Petrolíferu hanesan PIB iha projesaun sa'e hosi 2,1% iha outubru, iha projesaun foun 2,7%. Iha tendénsia ezekusaun kiik ba orsamentu ne'ebé boot, ne'e duni presupostu ba ida-ne'e, ajusta ona,” refere nota ne'ebé Agência TATOLI asesu hosi Ministériu Finansa (MF), kinta ne'e.

Aprovasaun ne'e PN autoriza Governu halo levantamentu hosi Fundu Petrolíferu ho montante \$1.311.387.267, ne'ebé total Rendimentu Sustentável Estimadu (RSE) \$637.656.024, enkuantu projesaun ba Produu Internu Brutu (PIB) non sustentabilidade Fundu Petrolíferu hosi tetu orsamentu aprovalu foun biliaun \$1,95.

“Enkuantu, kompozisaun hosi tetu orsamentu foun iha alokasaun orsamentu ne'ebé boot ba “Transferénsia Pagamentu' sira (hosi 31% to'o agora 41%), ne'ebé iha impaktu ne'ebé kiik ba kresimentu ekonómiku,” nota MF esplika.

Fundu Petrolíferu tuir projesaun sei ramata tinan-haat, antes *do que* iha tetu orijinal biliaun \$1,675 ho presupostu despeza per kapita réal hanesan nafatin no bainhira ita projeta kresimentu orsamentu iha futuro ba taxa kresimentu tuir kategoria dotasaun istóriu, Fundu Petrolíferu ramata iha tinan-rua antes.

“Ida-ne'e signífika katak Fundu Minarai sei ramata totalmente iha tinan 2033, ne'ebé tinan 11 de'it ona hosi tinan 2022. Hafoin tinan 2033, Orsamentu Estadu Timor-Leste sei hetan finansiametu husi reseita doméstika de'it, ne'ebé daudaun ne'e kuaze 12% de'it hosi kustu sira, ne'ebé mak daudaun ne'e la kobre kategoria Sálariu no Vensimentu,” nota ne'e afirma.

Foin lalais ne'e Banku Sentrá Timor-Leste (BCTL, sigla português) relata relatóriu ne'ebé mensiona kapital Fundu Petrolíferu to'o setembru atinje ona biliaun \$19,17 .